

Sukan Universiti 2008 uji kemampuan sebenar Masum



DR. OSMAN (empat dari kiri) bersama sekretariat Masum yang baru pada sidang media Sukan Universiti ASEAN di Bangi semalam.

Oleh YASMIN RAMAN

sukan@kosmo.com.my

KEMAMPUAN Majlis Sukan Universiti-Universiti Malaysia (Masum) sebagai penganjur sukan bakal diuji apabila Malaysia menjadi tuan rumah Kejohanan Sukan Universiti ASEAN (SUA) pada 11 Disember tahun ini.

Pengerusi Masum, Prof. Madya Dr. Osman Omar berkata beraksi selaku tuan rumah, Masum akan menggunakan kelebihan itu untuk muncul juara keseluruhan dalam semua acara yang dipertandingkan.

"Kami kini dalam usaha untuk mengerakkan program penyediaan atlet bagi memastikan atlet kami benar-benar bersedia menghadapi temasya itu kelak.

"Kami juga meletakkan sasaran untuk memenangi semua acara yang dipertandingkan nanti," jelasnya pada sidang media semalam.

Dia menjelaskan, SUA 2008 kali ini bakal disertai oleh semua negara ASEAN ter-

masuk Timor Leste dan Brunei.

"Ini merupakan kali ketiga kami tampil sebagai tuan rumah temasya ini dan kami berjanji, kontinjen Masum kali ini diwakili atlet daripada semua universiti di seluruh negara," ujarnya.

Sementara itu, Masum turut mengumumkan beberapa program yang bakal dilangsung sepanjang tahun ini.

Antaranya ialah persediaan menghadapi Kejohanan Sukan Universiti Dunia pada 5 Mei hingga 15 Oktober yang akan diadakan secara berperingkat di Kuala Lumpur selain Sukan Malaysia (Sukma) 2008, juga pada bulan Mei di Terengganu.

"Atlet kini juga sedang giat menjalankan latihan dan kem-kem latihan ini akan berterusan hingga bulan Jun nanti," katanya.

Berdasarkan rekod, Malaysia pernah menjadi tuan rumah temasya ini pada edisi 1984 dan 1992 dengan pencapaian terbaik adalah menduduki tempat kedua di Manila (2001) dan Surabaya (2004).